

Paulette Lenert

Vizepremierministesch
Ministesch fir Konsumenteschutz
Gesondheitsministesch
Delegéiert Ministesch fir sozial Sécherheet



© SIP/Yves Kortum

D'Paulette Lenert ass den 31. Mee 1968 zu Lëtzebuerg gebuer.

Studium an Ausbildung

No hirem Secondairesstudium am Stater Kolléisch studéiert d'Paulette Lenert op der Universitét Aix-Marseille III, wou si 1991 hiren Diplom am privaten Droit kritt. No hirem Maîtrise mécht si e Master am europäesche Recht op der Universitét London a kritt 1992 hiren Diplom. Bei hirem beruffsbegleedende Formatioun setzt d'Paulette Lenert de Schwéierpunkt op europäescht Recht esou wéi op d'Ausbildung vun hire Kompetenzen an der öffentlecher Verwaltung souwéi der Systemanalys.

Regierungsfunktiounen

No de Chamberwale vum 14. Oktober 2018 trëtt d'Paulette Lenert de 5. Dezember 2018 als Ministesch fir Entwécklungszesummenaarbecht an humanitär Ugeleeënheeten an als Ministesch fir Konsumenteschutz an d'Koalitiounsregierung aus DP, LSAP an déi gréng an. Nodeems den Étienne Schneider aus der Regierung zeréckgetrueden ass, gëtt d'Paulette Lenert de 4. Februar 2020 zur Gesondheitsministesch an zur delegéierter Ministesch fir sozial Sécherheet ernannt a behält de Ressort Konsumenteschutz bäi. No der Regierungsembildung vum 5. Januar 2022 gëtt d'Paulette Lenert zur Vizepremierministesch ernannt a behält hir aner ministeriell Kompetenze bäi.

Beruffstätégkeet

D'Paulette Lenert huet hir berufflech Carrière 1992 als Affekotin um Barreau de Luxembourg ugefaangen. 1994 fänkt si als Attachée de justice beim Justizministère un.

1997 gëtt si als Éischt Riichterin um Verwaltungsgericht nominéiert a bis 2010 ass si och Vizepresidentin vum Verwaltungsgericht. Vun 2010 bis 2013 ass si Éischt Regierungsconseillère beim Delegéierte Minister fir solidaresch Ekonomie.

Dono iwwerhëlt d'Paulette Lenert d'Direktioun vun der Cellule de facilitation en matière d'urbanisme et environnement, déi 2013 nei geschaf gouf an dem Staatsministère ënnerläit. 2013, no der Ëmbildung vun de ministeriellen Departementer, trëtt si dem Ministère fir d'Fonction publique an d'Verwaltungsreform bäi a gëtt do 2014 Éischt Regierungsconseillère an iwwerhëlt déi allgemeng Koordinatioun. Am Januar 2017 gëtt si och als Chargé de direction vum Nationalen Institut fir öffentlech Verwaltung nominéiert. Den Dag wou d'Paulette Lenert der Regierung bäigetrueden ass, huet si déi Funktiounen all opginn.

Veräinsaktivitéiten

Vun 2011 bis 2013 ass d'Paulette Lenert Member vum Verwaltungsrat vu ProActif a.s.b.l. Si war och Member vum Verwaltungsrat vun der Initiativ Rëm Schaffen a.s.b.l., eng Funktioun déi si opginn huet, wéi si der Regierung bäigetrueden ass.

www.gouvernement.lu



LE GOUVERNEMENT
DU GRAND-DUCHÉ DE LUXEMBOURG